

白樂天文集卷之二十七

哀祭文

哀二良文 并序

丞相隴西公出鎮于汴州軍司馬御史大夫陸
長源實左右之二年而軍用寧司空南陽公作
藩于徐州軍副使祠部員外郎鄭通誠實先後
之三年而民用康暨十五年春隴西薨浹辰汴
師亂大夫以直道及禍十六年夏南陽薨翌日
而難作員外以危行遇會惜乎大夫人之望也



員外國之良也咸克絜于身儉于家勤于邦又
申之以言行文學智謀政事故其厯要官參劇
務如刀劍發劔割而無滯如鍾磬在懸動而有
聲識者以為異時登天子股肱耳目之任必能
經德秉哲紹復隴西南陽之事業以藩輔王家
嗚呼善人宜將鍾奕葉之慶而不免及身之禍
天乎報施之朕何其舛歟昔詩人賦黃鳥之章
以哀三良不得其死今斯文亦以哀二良其辭
云

噫大化之無形兮浩浩而茫茫中有禍身兮若機之
張梁之亂兮陸受其毒徐之難兮鄭罹其殃惟善人
兮邦之紀綱邦之瘁兮而人先亡謂天之惡下民兮
胡為生此忠良謂天之愛下民兮胡為生此豺狼我
欲階冥冥問蒼蒼蒼蒼之不可問兮俾我心之盡傷
悲夫而今而後吾知夫天難忱命靡常

城北門文

某年月日某官某等謹致祭于外城北門某聞北廓
四門之神有水旱之災於是乎營之今年春天作淫

雨將害于衆墊于民惟城積陰之氣惟北太陰之位
是用昭告一城之北門惟門有神裁之某以天子休
命殿于是邦大懼天厲之不時偶黎民阻飢敢以正
辭告神神若知何不聰敢以至誠感神神若知何不
弔尚克陰沴不作雨暘成若百穀用成庶民用寧實
惟廓之神門之靈於戲北廓北門之神明聽斯言罔
俾雨水昏墊以作某之憂神之羞

祭符離六兄文

維貞元十七年某月某日從祖弟居易等謹祭于符

離主簿六兄之靈嗚呼聖意情愚不及情情所鍾者
唯居易與兄豈不以親莫愛於弟兄別莫痛於死生
斯親而有斯別也孰能不哀從中來而失聲去年春
居易南遊兄亦東適黔歛之間欣然一覲相顧咲談
相勉行役中路遽別情甚感激孰知此別為生死隔
矧兄遇疾于路路無藥石歸全于家家無金帛環堵
之室不容弔容稚豎之子未知哀戚自古孔懷之痛
亦莫我之與劇古人有言神福仁天福敬又曰惡有
餘殃善有餘慶惟兄道源乎太和德根乎至性以孝

義肥其身以仁信擅其行而位不登於再命年不及於知命何報施之訛斯俾吾兄之不幸嗚呼已焉哉既卜遷日既宅新阡春春之中畫為墓田濰水南岸符離東偏其地則邇其別終天惟弟子家人儼拜哭於車前魂兮有知鑒斯歎斯遙知居易之心霏霏而然

祭楊夫人文

維元和二年歲次戊子八月辛亥朔十九日巳巳將仕郎守左拾遺翰林學士太原白居易謹以清酌庶

羞之奠致祭于陳氏楊夫人之靈惟夫人柔明治性溫惠保身靜脩言容動中規度洎承訓師氏作嬪良人茂四德而蘭幽有香潔百行而玉立無玷發為淑聞著為芳猷姻族有輝閨闈是式噫福仁何味積慶無徵宜享永年遽歸長夜浮生若此永痛如何嗚呼生必有涯人誰不沒所甚感者其惟情乎故事劇者情易鍾感深者理難遣夫人雖宜其室竟未辭家當和順之誠不得施於婦如蘊孝敬之德不得展於舅姑有志莫伸何恨過此况一嬰沈痾自夏徂秋伏枕

七旬姊妹視疾歸視千里弟兄主喪凋桃李之花夫
遠不見失乳哺之愛女小未知乃使哀情倍鍊血屬
洛川迢遞秦野蒼茫日慘不光雲愁無色姊妹且病
親老尤慈哭別一聲聞者腸斷居易早聆懿範近接
嘉姻維私之眷每深有動之情何已敬陳薄奠庶鑒
悲誠尚饗

祭小弟文

維元和八年歲次癸巳二月某朔二十五日仲兄居
易季兄行簡以清西之奠致祭于亡弟金剛奴嗚呼
川水一逝不復再還手足一斷無因重連惟吾與爾
其苦亦然黃墟白日相見無緣每一念至腸熱骨酸
如以刀火刺灼心肝况爾之生生也不天苗而不秀
九歲夭焉昔權殯爾濰南平原今改葬爾渭北新阡
祔虎瑩之北次就畢位於東偏奠神魂之不孤庶窀
穸之永安嗚呼自爾捨我歸於下泉日來月往二十
二年五等罪逆不孝殃罰所延一別爾後再罹凶報
灰心垢面泣血漣漣松楸之下其生尚殘昔爾孤於
地下今我孤於人間與其偷生而孤苦不若就死而

白集卷之二十七
五
團圓欲自決以毀滅又傷生於歸全進退不可中心
煩寃仰天一號痛苦萬端嗚呼爾魂在几爾骨在棺
吾親奠酌於爾牀前苟神理之有知豈不聞吾此言
尚饗

祭烏江十五兄文

時在宣城

維貞元十七年七月七日從祖弟居易謹以清酌庶
羞之奠敬祭于故烏江主簿十五兄之靈易云積善
之家必有餘慶書曰其夭夭人大中絕命則冉牛斯
疾顏回不幸何繆舛之若斯諒聖賢之同病惟兄之

生生而不辰孩失其怙幼喪所親旁無弟兄藐然一
身自強自立以至成人蓋以孤子靡託孝友彌敦曰
居易與兄及高九行簡雖從祖之昆弟甚同氣之天
倫故雖百里信宿之別曷常不惻然而悲卒矧然天
之永訣知後期而無因徒撫膺而隕涕諒沈痛之難
伸追思乎早歲離阻各悲零傳中年集會共喜長成
同參選於東都俱署吏於西京居則共被而寢出則
連騎而行友于四人同年成名優游咲傲怡怡弟兄
雖不侔八龍三虎亦自謂當家一時之榮及兄辭滿

淮南薄遊江東居易三以行邁忽逆旅而逢或酒或
歌宴紆從容何朝不遇何夕不同常以兄仁信根于
心孝悌積于躬謂至行之有荅必景福以來從嗚呼
位始及一命祿未過數鍾年乃不得四十而歿於道
途之中謀壯志之不展結幽憤於無窮况肇業東洛
先塋北邙三千里外身後陵陽有妹出嫁無男主喪
悠悠孤旌未辦還鄉宣城之西荒草道傍旅痛於此
行路悲涼大風蕭蕭白日無光聚今晨之第姪對前
日之盃觴稽首再拜竟兮來享進三奠而退慟孰不
神酸而骨傷哀哉伏惟尚饗

祭浮梁大兄文

時在九江

維元和十三年歲次丁酉閏五月己亥居易等謹以
清酌庶羞之奠再拜跪奠大哥于座前伏惟哥孝友
慈惠和易謙恭發自哲身施於為政行成門內信及
朋僚庶幹露於官方溫重刑於酒德異資福履屢受
康寧不謂纔及中年始登下位辭家未踰數月寢眠
未及兩旬皇天無知降此凶酷交遊行路尚為興慟
骨肉親愛豈可勝哀舉聲一號心骨俱碎今屬日時

叶吉寔宥有期下邳南原永附松楸居易負憂繫職
身不自由伏枕之初既闕在左右執紼之際又不獲
躬親痛恨所鍾倍百常理嗚呼追思曩昔同氣四人
泉壤九原劉奴早逝巴蜀萬里行簡未歸玆然一身
漂棄在此自哥至止形影相依死灰之心重有生意
豈料避弓之日毛羽摧頰垂白之年手足斷落誰無
兄弟孰不死生酌痛量悲莫如今日宅相癡小居易
無男撫襯之間過於猶子其餘情理非此能申伏冀
慈靈俯從悲懇哀纏瘳結言不成文嗚呼哀哉伏惟

尚饗

祭匡山文

維元和十二年歲次丁酉二月辛酉朔二十一日將
仕郎守江州司馬白居易謹以清酌之奠敢昭告于
匡山神之靈恭惟神正直聰明扶持匡廬福利動植
居易賦命蹇屯與時參差願於靈山棲此陋質遺愛
寺側既置草堂欲居其中叅禪養素而開構池宇
在神域中往來道途由神門外輒用酒脯告虔于神
神其聽之歆此薄奠非敢徼福所期薦誠尚饗

祭廬山文

維元和十二年歲次丁酉二月二十五日乙酉將仕郎守江州司馬白居易以香火酒脯告于廬山遺愛寺四旁上下大小諸神居易夙聞匡廬天下神秀幸因左官得造茲山又聞永遠宗雷同居于是道俗並慶古之遺風而遺愛西偏鄭氏舊隱三寺長世招于此居創新堂宇疏舊泉沼或來或往棲遲其間不唯耽翫水石以樂野性亦欲擺去煩惱漸歸空門倘秩滿以來得以閒遂餘生終老願托於斯今冀如既

成遊息方始爰以潔敬薦茲馨香不敢媚神不敢讓福但使痢厲不作魑魅不逢猛獸毒蟲各安其所苟人居之靜謐則神道之光明齊心露誠庶幾有荅尚饗

祭李侍郎文

維長慶元年歲次辛丑五月丙申朔十日乙巳中散大夫守中書舍人翰林學士上柱國賜紫金魚袋元稹朝議郎守尚書主客郎中白居易謹以清酌庶羞之奠致祭于故刑部侍郎贈工部尚書隴西李公杓直之靈於戲代重名義公能佩服德潤行擅溫溫郁

郁凡嚮善者如螳慕肉時重爵位公負楨幹奉職天
官是攝是贊尚書六職公理其半朝重文翰公掌詔
令西閣絲言內庭密命公實出入迭操二柄家重隆
盛公既陳許兩掖中臺差肩接武青幢赤第淑州李
處門重婚嗣公娶令族鏘鏘振振和鳴似續男女七
人五珠二玉年重壽考公亦云老心雖壯健髮已華
皓五十加八亦不為大人重康寧公體豐盈迨乎奄
忽不失和平啓手足夜無呻吟聲古稱五福公有七
福凡人得一死猶瞑目矧公兼之豈有不足所不足

者不在其身怏怏惻惻其在他人為門戶惜主為骨
肉惜親為吾儕惜良友為朝廷惜賢臣况積也不才
居易無似辱與公遊十九年矣昔貞元歲俱初筮仕
並命同官蘭臺令史以公明達以我頑鄙度長絜能
信非倫擬一言脗合不知所以莫逆之交貴從茲始
清問登近迎釋詭毀浮澧通州左遷萬里或合或散
一伏一倚浩浩出途是非同軌齒牙相軋波瀾四起
公獨何人心如止水風雨如晦鷄鳴不已不因紛阻
孰辯君子以膠投漆如張有矢所以綢繆見子生死

前年去年次第徵還或先或後俱到長安水流火就
松茂栢權置酒欲飲握手何言初論瘴癘次叙艱難
三心六眼同一潸然稹與居易旋登禁掖公領銓衡
職勤務劇私室多故公門少隙歡會實稀光陰虛擲
不相勸勉急務歡適且曰朱顏已去白日可惜花陰
春朝松園月夕大開口笑滿酌酒嘆言約則然心期
未獲嗚呼杓直而忍遺我棄我何處捨我何之豈反
真歸空漠然而無所為將精多魂強的然而有所知
恍如聞兮倏如覩未甘心於永辭被有靈兮此有夢

胡不一來兮質我疑逝川渺其不迴日月忽乎有時
指岐下以歸祔補大塋之威儀禮有進而無退阻於
庭而送之畿旌竿舉兮轎輪動遂不得少留乎京師
嗚呼杓直其鑒于茲爵盈不飲豆乾不食如之何勿
思公兒號我公馬嘶我如之何勿悲嗚呼杓直已而
已而哀哉尚饗

禱仇王神文

維長慶二年歲次癸卯八月癸未朔十七日巳亥朝
議大夫使持節杭州諸軍事守杭州刺史上柱國白

居易謹遣朝議郎行餘杭縣令常師儒以清酌之奠
敬祭于仇王神嘗聞神者所以司土地守山川禽獸
福生人也餘杭縣自去年冬逮今秋虎暴者非一神
其知之乎人死者非一神其念之乎居易與師儒猥
居牧宰慙無政化不能使渡江出境是用虔告于神
惟神廟居血食非人不立則人神之主也獸神之屬
也今縱其屬殘其主於神何利焉於人何辜焉若一
夕之後神其有知即能輝靈申威服猛禁暴是人之
福幸亦神之昭昭若人告不聞獸害不去是無神也

人何望哉嗚呼正直聰明盍鑒乎此尚饗

祈臯亭神文

維長慶二年歲次癸卯七月癸丑朔十六日戊辰朝
議大夫使持節諸軍事守杭州刺史上柱國白居易
以酒淨香果昭告于臯亭廟神去秋愆陽今夏少雨
實憂災沴重困杭人居易忝奉詔條愧無政術既逢
愆序不敢寧居日昨禱伍相神祈城隍祠靈雖應期
雨未霑足是用選日祇事敬請于神恭聞明神稟靈
於陰祇資善於釋氏聰明正直潔靜慈仁無幽不通

有感必應今請齊心虔告神其鑒之若四封之間五日之內兩澤霈足稼穡滋稔敢不增修像設重薦馨香歌舞鼓鍾備物以報如此則不獨人之福亦惟神之光若寂寥自居眇饗無應長吏虔誠而不荅下民顛望而不知坐觀田農使至枯槁如此則不獨人之困亦惟神之羞惟神裁之敬以俟命尚饗

祭龍文

維長慶三年歲次癸卯八月癸未朔二日甲申朝議大夫使持節杭州諸軍事守杭州刺史上柱國白居易

易率寮吏薦香火拜告于北方黑龍惟龍其色玄其位坎其神壬癸與水通靈昨者歷禱四方寂然無應爰將恐馭澤能救物我實有望於龍物不自神龍豈無求於我若三日之內一雨霽電是龍之靈亦人之幸禮無不報神其聽之急急如律令

祭崔相公文

維大和六年歲次壬子十月庚申朔二十四日癸未中大夫守河南尹上柱國晉陽縣開國男食邑三百戶賜紫金魚袋白居易謹以清酌庶羞之奠敬祭于

故相國吏部尚書贈司空崔公敦詩惟公德望事業
識度操履為時而生作國之紀嚴廊匡輔藩部政治
父母黎元股肱天子斯皆談在人口播於人耳今所
叙者眷之而已於戲自古及今實重知音故詩美伐
木易稱斷金始愚與公同入翰林因官識面因事知
心獻納合章對揚聯襟以忠相勉以義相箴朝按同
食夜床並衾綢繆五年情與時深及公登庸累分間
鎮愚亦去國出領符印徐宣遠部忠抗遐郡鴈去寄
書潮來傳信無由會合祇望音問未卜後期但敦前

分余太和之初連袂歸朝公長夏司愚貳秋曹玉德
彌溫松心不凋南公多暇屢接遊遨竹寺雪夜杏園
花朝杜曲春晚潘亭月高前對青山後携濁醪微之
夢得慕巢師臯或微雅言酣詠陶陶或命作樂絲管
嘈嘈藉草蔭松枕麴餉糟曾未周歲索然分鑣公又
授鉞南樵荆蠻報政入覲復摠天官愚因謝病東歸
澗瀍方從四皓旋守三川時蒙問訊日奉周旋且無
要約良有由緣洛城東隅履道西偏脩篁迴合流水
潺湲與公居第門巷相連與公齒髮甲子同年兩心

相期三逕之間優游携手而終老焉嗚呼易失者時
難忱者天既奪我志又殲我賢丘園未歸館舍先捐
百身莫贖一夢不還鬱鬱佳城茫茫九原淒涼蕭鼓
慘澹風煙俎奠遲遲涕泣漣漣平生親友羅拜柩前
賢人已矣天地蒼然嗚呼哀哉敦詩尚饗

祭崔常侍文

維大和九年歲次乙卯二月丙午朔七日壬子中大
夫守太子賓客分司東都上柱國賜紫金魚袋白居易
易謹以清酌庶羞之奠敬祭于故秘書監贈禮部尚

書崔公惟公之世祿家系文華政事播於時論此不
復云今但叙舊好篤衷誠而已嗚呼居易弟兄與公
伯仲前後科第同登者四五辱為僚友三十餘年又
膳部房與公同聲塵之遊定膠漆之分兩家不幸十
年已來哀豐所鍾零落殆盡我老君病唯餘二人天
不憖遺公又即世不登大位不享永年夙志莫伸幽
憤何極居易方屬疾恙不遂執紼遣姪阿龜往展情
禮如此不祭永痛柰何嗚呼重易平生知我寢門一
慟可得而聞乎嗚呼重易平生嗜酒真筵一酌可得

而歆乎嗚呼哀哉伏惟尚饗

祭浙江文

維長慶四年歲次甲辰五月己酉朔四日壬子朝議
大夫使持節杭州諸軍事守杭州刺史上柱國白居易
易謹以清酌少牢之奠敢昭告于浙江神滔滔大江
南國之紀安波則為利澤流則為害故我上帝命神
司之今屬潮濤失常奔激西北水無知也如有憑焉
侵浩郊鄧壞敗廬舍人墜墊溺籲天無辜居易祇奉
盟書興利除害守土守水職與神同是用備物致誠

躬自虔禱庶俾水反歸壑谷遷為陵土不騫崩人無
蕩折敢以醴幣羊豕沉奠于江惟神裁之無忝祀典
尚饗

白樂天文集卷之二十八

碑銘

有唐善人墓碑

唐有善人曰李公公名建字杓直隴西人魏將軍申公發公十五代祖也周柱國陽平公逵六代祖也綏州刺史明高祖也太子中允進德曾祖也綿州昌明令珍王太父也雅州別駕贈禮部尚書震考也贈博陵郡太君崔氏妣也陳許節度禮部尚書遜兄也渭源縣君房氏妻也容管招討使齊外舅也長慶元年

二月二十三日夜無疾即世于長安脩行里第是歲
五月二十五日歸祔于鳳翔某縣某鄉某原之先塋
春秋五十八有二女五男曰訥朴恪慤碩公官歷校
書郎左拾遺詹府司直殿中侍御史北部兵部吏部
員外郎兵部吏部郎中京兆少尹澧州刺史太常少
卿禮部刑部侍郎工部尚書職歷容州招討判官翰
林學士鄜州防禦副使轉運判官知制誥吏部郎中
階中大夫勲上柱國爵隴西縣開國男有史官之居
郎渤海高錢作行狀翰林學士中書舍人河南元稹

作墓誌有尚書主客郎中知制誥太原白居易作墓
碑大署其碑曰善人墓善人者何公幼孤孝養太君
太君老疾常曰痿子勸吾食吾輒飽勸吾藥吾意其
疾瘳痿子公小字也及長居荊州石首縣其居數百
家凡爭鬪稍稍就公決公隨而評之寢反鄉人不詣
府縣皆相率曰請問李君公養有餘力讀書屬文業
成與兄遜起應進士俱中第為校書時以文行聞故
德宗皇帝擢居翰林翰林時以視草不詭隨退官詹
府詹府時以貞恬自處不出戶輒逾月鄜帥路怒高

之揜音琴請為副在郵時有非類者至以病去為御史
時上任有過其行事者作謬官詩以諷為吏部郎時
調文學科醫吏課高者得無停年又省減勞急成狀
限繇是吏輩無緣為姦訖今選部用其法知制誥時
筆削間有以自是不出者因請告改少尹少尹時與
大議歲減府稅錢十三萬在澧時不鞭人不名吏居
歲餘人人自化在禮部時由文取生不聽譽不信毀
公為人質良寬大體與用綽然有餘裕為政廉平易
簡不求赫赫名與人交外淡中堅接士多和而有別

稱賢薦能未嘗倦好議論而無口過遠邪說而不忤
物其居家菲衣食厚賓客敬兄嫂禮妻子愛生姪初
先太君好善佛書不食肉公不忍違其志亦終身蔬
食自八九歲時始諷畢盡得其義善理王氏易左氏
春秋前後著文凡一百五十二首皆詣理撮要詞無
枝葉其卓然者有詹事府司直北部員外郎廳記請
雙日坐蔬與梁肅書上宰相論選事狀秉筆者許之
薨之日不識者惜識者嘆交游出涕執友慟夫如是
其善人乎傳曰善人國之紀語曰善人吾不得而見

之矣噫善人之稱難乎哉獨加於公無愧焉銘曰
古者墓有表表有云顯其行省其文故季札死仲尼
表其墓曰君子今吾喪李君署其碑曰善人嗚呼李
君有知乎無知乎君之名與此石俱

唐故通議大夫和州刺史吳郡張公神道碑

銘并序

張之為著姓尚矣自漢大傅良侍中肱晉司空華丞
相嘉以降勲賢軒冕歷代不乏肱避地渡江始居于
吳故其子孫稱吳郡人嘉以孝悌聞于郡故其所

號孝張里嘉之曾孫俗在宋為司徒郎公五代祖也
司徒之孫儔在隋為吳郡都督即公曾王父也台州
臨海令諱鷗即公王父也袁州司馬諱孝績即公皇
考也或以人物著或以閭閻稱迄今為江南右族諱
無擇字無擇未冠丁袁州府君憂廬于墓晝號而夜
泣者三年矣有靈芝醴泉出焉既冠好學能屬文從
鄉試登經第應制舉人精通經史科補弘文館校書
郎調左金吾錄事換杭州錄事參軍在杭州前後詰
偽制補吏者二十八人駁假年侍老者二千人舉而

正之人服其明會劉幽求來為刺史舉課聞詔授絳州錄事參軍絳之郡有主胥者估寵侮法豪奪人利公數其罪露章奏之章下丞相姚元崇竒之致書褒美尋改太原府功曹參軍給事中張杲為江漢安撫使表公正直奏置部從事吏部尚書陸象先為河東按察使狀公清白奏授懷州獲嘉令在獲嘉以不茹柔得人心以不吐剛得罪繇是左遷鄂州司馬移深州司馬轉號州長史時上方思理詔求二千石之良者時宰以公塞詔擢拜和州刺史公在郡奉詔條郵

人隱而已不知其他無何水潦害農公請蠲穀藉之損者十七八時李知柔為本道採訪使素不快公之剛直密疏誣奏以附下為名遂貶蘇州別駕老幼攀泣而遍道者數百人信宿方得去移曹州別駕歲餘謂病歸老于家天寶十三載正月二十一日終于東都利仁里私第其年二月十二日塋于河南府伊闕縣中李原享年八十三噫公生天地間八十有三年可謂壽矣其間當明皇帝馭天下四十有五年可謂時矣有其才得其壽逢其時然職不過陪臣秩僅至

郡守凡所貯蓄鬱而不舒嗚呼其命也夫公之文學
常為賀知章賈彦璿許之公之諒直常為李邕張廷
珪稱之公之政事又為劉姚張陸推之夫以八君子
之力援之而不足以一知柔之力排之而有餘厄窮
不振以至沒齒嗚呼其命也夫古人云道不虛行又
云其後必有達者故公之子大理評事誠以節行聞
于時公之孫戶部侍郎平叔以才位光于國報施之
道信昭昭矣不在其身則在子孫相去幾何武長慶
二年某年月某日平叔奉祖德碣之居易據家狀序

而銘之其詞曰

有木有木碩大而長破為桶棧不作棟梁有驥有驥
規行矩步辱在短轅不駕大輅嗚呼噫嘻公亦如之
將時不遇我而我不遇時勿謂已矣天賜多祉既賢
其子以濟其美又才其孫以大其門苟無先德孰啓
後昆

唐贈尚書工部侍郎吳郡張公神道碑銘并序

有唐嶺南觀察推官試大理評事吳郡張公大曆三
年十一月八日終于伊川別墅五年八月七日塋于

伊闕縣中李原春秋五十五元和十三年詔贈主客
員外郎明年贈太常少卿又明年贈尚書工部侍郎
夫人吳郡陸氏貞元二年某月某日終于其所春秋
六十六追封嘉興縣太君又封吳郡太夫人嗣子通
議大夫守尚書戶部侍郎判度支上柱國賜紫金魚
袋平叔以長慶二年某月某日立神道碑太原白居易
易文其碑云公諱誠字老來吳郡人父諱無擇和州
刺史祖諱孝績棗州司馬由高曾而上世德世祿載
在和州府君碑內此不書公年十八以通經中第及

調判入高等授蘇州長洲尉秩滿丁先府君憂既
又丁先太夫人憂泣血六年哀毀過制以方罹再亂
殆無宦情既除喪退居不調者累年而親友以大義
敦責不得已而復起選授左武衛騎曹參軍分司東
都屬安祿山陷覆洛京以偽職淫刑脅劫士庶公與
同官范陽盧巽潛遁于陸渾山食木實飲泉水者二
年訖不為逆命所汙及肅宗嗣位詔河南尹薛平
俾訪不仕賊庭隱藏山谷者伯連得六人以應詔而
公與巽在焉繇是名節聞于朝野君子以為知道優

詔褒美特授密縣主簿未周歲遷宋州碭山縣令時
睢陽當大兵後野無草里無人公撫之一年襁負至
二年汙萊闢三年衣食足及解印去縣民相率泣而
餞之君子以為知政嶺南節度觀察使李勉律人也
既高公陸渾之節又美公碭山之政欲以名職授介
起而大之遂奏授試大理評事充觀察推官
簡牒到門即公捐館舍之明日也才如是命如
守哀哉公常自負其才不後於人自疑其命不
去碭山而反伊川也

賦詠懷詩云論成方辯命賦罷即歸田竟如是言終
于衡茅之下君子以為知命公有三子曰平仲平叔
平季夫人陸氏即國子司業集賢殿學士善經之女
賢明有法度初公既歿諸子尚幼夫人勤求衣食親
執詩書諷而導之咸為令子又常以公遺志擇其子
而付之故平叔率能振才業致名位追爵命碭碑表
繼父志揚祖德此誠孝子順孫之道也亦由夫人慈
善教誘之德浸漬而成就之不其然乎居易常辱與
戶部游而知其家事始見託撰述傳信焉銘曰

猗嗟碣山以文行保家聲以義節振時名以惠政撫
縣民而職不登諸侯卿秩不及延尉評悲哉猗嗟碣
山前有和州名德如彼後有戶部才位若此才子之
父名父之子賢者兼之可謂具美休哉

傳法堂碑

王城離城有佛寺號興善寺之次也有僧舍名傳法
堂先是大徹禪師晏居于是寺說法于是堂因名焉
有問師之名迄曰號惟寬姓祝氏衢州信安人祖曰
安父曰皎生十三歲出家二十四具戒僧臘三十九

報年六十三終興善寺堊瀟陵西原詔謚曰大徹禪
師元和正直之塔云有問師之傳授曰釋迦如來欲
涅槃時以正法密印付摩訶迦葉傳至馬鳴又十二
葉傳至師予比丘及二十四葉至佛馱先那先那傳
圓覺達摩達摩傳大弘可可傳鏡智璨璨傳大醫信
信傳圓滿忍忍傳大鑿能是為六祖能傳南岳讓讓
傳洪州道一一謚曰大寂寂即師之師貫而次之其
傳授可知矣有問師之道屬曰自四祖以降雖嗣正
法有家嫡而支派者猶大宗小宗焉以世族譬之即

師與西堂藏甘泉賢勒潭海百巖暉俱父事大寂若
兄弟然章敬澄若從父兄弟徑山歛若從祖兄弟鶴
林素華嚴寂若伯叔然當山忠東京會若伯叔初萬
山秀牛頭融若曾伯叔祖推而序之其道屬可知矣
有問師之化緣曰師為童男時見殺生者盡然不忍
食退而發出家心遂求落髮於僧曇受口羅於佛崇
學毗尼於僧知澄大乘法於天台上觀成最上乘諸
於大寂道一貞元六年始行於閩越間歲餘而返心
敬服者百數七年於會稽作滕家道場八日

與山神受八戒於鄱陽作迴嚮道場十三年感非人
於少林寺二十一年作有為功德於衛國寺明年施
無為功德於天宮寺元和四年憲宗章武皇帝召見
於安國寺五年問法於麟德殿其年復靈泉於不空
三藏也十二年二月晦大說法於是堂說訖說化其
化緣云爾有問師之心要曰師行禪演法垂三十年
度白黑衆殆百千萬億應病授藥安可以一說盡其
心要乎然居易為贊善大夫時常四詣師四問道第
一問云既曰禪師何故說法師曰無上菩提者被於

身為律說於口為法行於心為禪應用有三其實一也如江河湖漢在處立名名雖不一水性無二律即是法法不離禪云何於中妄起分別第二問云既無分別何以脩心師曰心中無損傷云何要修理無論垢與淨一切勿起念第三問云垢即不可念淨無念可乎師曰如人眼睛上一物不可住金屬雖珍寶在眼亦為病第四問云無修無念亦何異於凡夫耶師曰凡夫無明二乘執著離此二病是名貞修貞修者不得動不得妄動即近執著忘即落無明其心要云

爾師之徒殆千餘達者三十九人其入室受道者有義崇有圓鏡以先師堂辱與予言之予嘗醍醐嗅簪蔔者有日矣師既歿後予出守南賓郡遠託譔述迨今而成嗚呼斯文豈直起師教慰門弟子心哉抑且志吾受然燈記記靈山會於將來故其文不避繁銘曰

佛以一印付迦葉至師五十有九葉故名師堂為傳法

唐撫州景雲寺故緯大德上弘和尚石塔碑

銘并序

元和十一年春廬山東林寺僧道深懷縱如建冲契
宗一至柔以言語智則智明雲臯太易等凡二十輩
與白黑衆千餘人俱實持故景雲大德弘公行狀一
通執錢十萬來詣潯陽府請司馬白居易作先師碑
會有故不果十二年夏作石墳成復來請會有病不
果十三年夏作石塔城又來請始從之既而僧反山
衆反聚落錢反寺府翌日而文就明年而碑立其詞
云爾

我聞位乾古先生出世法法要有三曰戒定惠戒生
定定生惠惠生八萬四千法門是三者迭為用若次
第言則定為惠因戒為定根定根直則苗茂因樹成
則果滿無因求滿猶夢果也無根求茂猶樞苗也雖
弗以一切種智攝三界必先用戒菩薩以六波羅密
化四生不能捨律律之用可思量不可思量如來十
弟子中稱優波離善持律波離戒有南山太師得之
西山滅有景雲太師得之師諱上弘姓饒氏曾祖君
祖公祝父知恭臨川南城人童而有知故生十五歲

發出家心始從舅氏剝落壯而有立故生十五歲立
菩薩願從南岳大圓太師具戒樂其所由故大曆中
不去父母之邦請隸于本州景雲寺修道應無所住
故貞元初離我我所從君洪州龍興寺說法親遊善
知識故與匡山法貞天台靈裕荆門法稟暨與果神
奏建昌惠進五長老交遊佛法屬王臣故與姜國相
公輔太師顏貞卿暨本道庶使揚君憑帝君丹四君
子友善菩提振禁戒故講四分律而從善遠罪者無央
數隨順化緣故坐甘露壇而誓衆生明者二十年荷

瞻大事故前後登方等施戶羅者十有八會救渡群
生故娑婆男女由我得度者萬五千七十二人示生
無常故元和十年十月己亥遷化于東林精舍示滅
有所故是月丙寅歸于南岡石墳住二十七年七歲
安居六十五夏自生至滅隨處示教行止語嘿無非
佛事夫施於人也博則反諸已也厚故門人鄉人
如不及繇是藝松成林琢石為塔塔有碑碑有銘曰
佛滅度後簷蔔香裊醍醐味醯誰反是香誰復是味
景雲大師景雲之生一匡苾芻中興毗尼景雲之滅

衆將安仰法將疇依昔景雲來道行者隨踐迹若路
今景雲去升堂者思入室者悲鑪峯之西虎谿之南
石塔巍巍有記事者以實真辭書于塔碑

故饒州刺史吳府君神道碑銘并序

汨市朝溺妻子非達也因山林擯血屬亦非達也若
有人與群動處一代間彼為彼我為我不自潔不自
污不巢許不伊呂水其心雲其身浮沉消息無止而
不自得者其達人乎吾友吳君從事於斯矣君諱
字真存太子通事舍人覽之曾孫睦州司馬庶之

太子宮門郎贈工部尚書詮之長子以進士第八官
官歷正字協律郎大理評事監察殿中侍御史太子
舍人水部庫部員外郎都官駕部郎中議諫大夫
大理少卿饒州刺史職歷義成軍節度推官浙西道
節度判官潼關防禦判官鎮州宣慰副使函使階
至中大夫勳至上柱國讀書數千卷著文數萬言實

曆元年六月某日薨于饒州官次其年十月某日葬
于嘗州晉陵縣仁和鄉北原從遺志也君生四五歲
弄泥沙時所作戲轉象道家法事八九歲弄筆硯時

所出言輒類詩篇章不自知其然蓋宿集儒玄之業
明矣既冠喜道書奉真籙每專氣入靜不粒食者累
歲顥氣充而丹田澤飄然有出世心既壯在家為長
属有三幼弟八稚姪噉噉慄慄不忍見其飢寒慨然
有干祿意乃曰肥遁不可以立順吾將業儒以馳名
名競不可以恬神吾將體玄以育德凍餒不可以安
道吾將強學以徇祿位不可以多取吾將知足而守
中繇是去江湖來京師求名得名求祿得祿身繫家
給之外無長物

處與天和終始履仕途二十七年享壽命八十二歲
無室家累無子孫憂屈伸寵辱委順而已未嘗一日
戚戚其心至于歸全反真故予所謂達人之徒歟信
矣仲弟湖州長史某以子辱與其兄遊既為同門生
又為同舍郎周知初終託為碑記噫先生之道吾能
引石以明之銘曰
漢中大夫東方曼倩夏侯湛高之

作廟兒讚

唐中大夫貞存先生白樂天知之

作神道銘

嗚呼二大夫異代而同塗其皆達者乎

碣銘

唐江州興果寺律大德湊公塔碣銘并序

如來滅後後五百歲有持戒見性者曰興果律師師
姓成號神湊京兆藍田人既出家具戒於南岳希標
大師參禪於鍾陵大寂大師志在首楞嚴經行在四
分毗尼藏其他與論以有餘力通大曆八年制懸經
論律三科策試天下僧師中等得度詔記江州興果

寺後後僧望移隸東林寺即鴈門遠大師舊道場有
甘露壇白蓮池在焉師既居是寺興佛事元和十二
年九月七日癘疾二十六日歿其十月十九日遷全
身于寺道北禰鴈門墳左春秋七十四夏臘五十一
至乎執師本行也以精進心脂不退輪以勇健刀搥
無畏鼓故登壇進健鬱為大將者垂三十年領羯磨
會十三化大衆萬數儀範所攝惠用所誘貴高僧慢
罔不降伏其威重如是自興果訖東林一孟齋一榻
居衣麻寢管如座漆寶絲是名聞壇施來無虛月盡

歸寺藏與大眾共之迨啓手足日前無長物其簡儉
如是師心行禪身持律起居動息皆有常節雖
寒暑風雨黑夜捧一鑪秉一燭行道禮佛者四十五年
凡十二時未嘗闕一其精勤如是師既疾函四大將
無戀著念無厭離想郡太守門弟子進鑿饋藥昔數
四師鎮之云報身非病焉用是為言訖趺坐恬然就
化其了悟如是門人道建利辯元審元總等封墳建
塔思有以識之先師常辱與子遊託為銘碣初子與
師相遇如他生舊識一見斯合不知其然及遷化時

予又題一四句詩為別蓋欲會前心集後然也不能
改作因取為銘曰

本結菩提香火社共嫌煩惱電泡身不須戀戀從師
去先請西方作主人

白樂天文集卷之二十八

白樂天文集卷之二十八

